


Noticia
Transparente
di Gobierno

ISLA ONLINE

Diahuebs 15 Augustus 2024

Email: IslaOnline@gobierno.aw Tel: 528-4952

ARTE DI MURAYA
SAN NICOLAS



**STABILIDAD
Y
PROSPERIDAD**
2 0 2 4



Gabinete Wever-Croes



PROME MINISTER

Evelyn Wever-Croes

DANKI NA E BON MANEHO FINANCIERO, GOBIERNO TA DUNANDO AUMENTO DI ENTRADA NA CIUDADANONAN



pa cuminsa duna alivio financiero na comunidad.

Prome Minister a indica cu Aruba ta progresando y cu e ta e unico pais den Reino cu pa di dos biaha consecutivo tin un surplus den su presupuesto. E presupuesto ta wordo entrega na tempo, y Parlamento ta aprob'e na tempo, algo cu no ta pasa cu e otro paisnan den Reino. E situacion financiero positivo aki, ta e resultado di e desaroyo economico, danki na e sector turistico cu ta bayendo asina bon, danki na e esfuerzo y sacrificio di e comunidad en general.

E resultado positivo aki, a trece un bahada den e cifranan di desempleo y inflacion, creando asina un espacio financiero pa Gobierno por duna alivio na e comunidad. "Manera ta conoci, e inflacion na Aruba semper a keda mas abou cu esun den region y di mundo, y apesar cu e ta bahando, costo di bida ta halto. P'esey ta importante pa yuda fortifica e poder di compra di esnan cu a wordo afecta", Prome Minister a expresa. ■■■■

Diahuebs 15 di augustus mainta durante conferencia di prensa di Gobierno di Aruba, Prome Minister Evelyn Wever-Croes a elabora riba finanzas publico di Aruba. Prome Minister a splica cu ya pa mas di un aña, Gobierno ta indicando cu ta importante pa pone finanzas publico di Aruba na orden pa asina por crea espacio financiero



Prome Minister Evelyn Wever-Croes:

Gobierno ta traha pa traduci e progreso den prosperidad den cada hogar na Aruba

GOBIERNO A ALOCA 21.1 MIYON FLORIN PA E

PROME PAGO DI INDEXERING NA EMPLEADONAN

PUBLICO Y DPS

Un di e temanan cu a wordo trata durante e Conferencia di Prensa di Gobierno di Aruba diahuebs mainta, ta e prome aumentonan cu a wordo duna na empleadonan publico y DPS.

Gobierno ta hibando un bon maneho financiero y pa e motibo ey por a crea e espacio financiero pa e alivio pa e empleado publico cu desde aña 2018 no a haya un indexering di salario, y na juli 2024 e empleadonan publico, incluyendo DPS (Dienst Publieke Scholen) a haya nan merecido indexering.

Prome Minister Evelyn Wever-Croes ta indica cu ta trata di un total di 4298 persona cu a haya un aumento di salario di 6% na juli 2024, y na januari 2025 nan lo haya e otro parti di e aumento cu ta di 5.7%. Gobierno a aloca 21.1 miyon florin pa e aumento di aña 2024 y pa e aumento di aña 2025, Gobierno lo mester aloca mas di 65.1 miyon florin.

“Danki na e bon situacion financiero cu Aruba tin na e momento aki, Gobierno a cuminsa aumenta e entrada di e ciudadano, yudando asina cu e poder di compra y asina e progreso di e pais por wordo traduci den prosperidad den cada hogar na Aruba”, Prome Minister a expresa.



EMPLEADO PUBLICO (INCL DPS)

● INDEXERING DI SALARIO

CANTIDAD HENDE	4.298
CANTIDAD AUMENTO	6%
CANTIDAD GASTO 2024	AWG. 21.100.000
CANTIDAD GASTO 2025	AWG. 65.100.000



MINISTER MADURO A REUNI Y CERA CONOCI CU E SECRETARIO DI ESTADO DI RELACIONNAN DI REINO NOBO, SEÑOR ZSOLT SZABÓ

A duna un bista di e trabounan pa mehora maneho financiero di Aruba



Recientemente Consejo di Minister a reuni y cera conoci cu e Secretario di Estado di Relacionnan di Reino nobo, señor Zsolt Szabó.

Durante e reunion aki cada minister a elabora riba su prioridadnan den gobernacion y Minister Maduro a elabora en corto riba e trabounan cu ta wordo haci den cuadro di e Landspakket pa mehora e maneho financiero na Aruba. Despues a sigui un presentacion di Director di Departamento di Finansa den cual a duna un relato mas amplio di e puntonan cardinal pa mehoracion financiero na Aruba cu ta encera, entre otro, cambio di ley di e sistema di raportahe financiero, introduccion di e modelo di '3 lines of defence,' mehoracion di sistema di informacion financiero computarisa y cambio di ley pa e maneho di materiaal den Gobierno.

Señor Szabó y su delegacion a keda impresiona cu e cantidad di trabou cu ta wordo haci pareu pa e ekipo di profesionalnan Arubano pa por mehora e maneho financiero na pais Aruba.

Minister Maduro di Finansa ta contento di por a haya e oportunidad pa cera conoci cu e Secretario di Estado nobo y alabes di por a dun'e un bista di locual ta e trabounan cu ta wordo haci door di su ministerio y su ekipo. Cu e presentacion cu Minister di Finansa a duna por bisa cu señor Szabó a keda



bon informa y sa den ki direccion Gabinete Wever-Croes ta hibando Aruba pa locual ta trata e parti di e maneho financiero di nos pais. ■■■



A BISHITA KIA HUNTO CU SECRETARIO DI ESTADO NOBO DI RELACIONNAN DI REINO SR. ZSOLT SZABÓ



Recientemente, Minister di Husticia y Asuntonan Social sr. Rocco Tjon, a sera conoci cu Secretario di Estado nobo di relacionnan di reino sr. Zsolt Szabó, y hunto cu su delegacion a haci un bishita na insitituto coreccional pa asina haya un bista di e infraestructura y alabes a haya un splicacion amplio di e diferente plannan cu tin riba mesa.

Manera ta conoci alrededor di dos aña pasa e structura di e organisacion, pues e formatie rapport a wordo adapta, pa di e forma ey, como organisacion, KIA por brinda e servicionan cu nan mester brinda y alabes garantisa miho seguridad pa nan propio personal. Actualmente, danki na e reorganisacion, tin diferente proyectonan andando, caminda structuralmente tin diferente programanan ta wordo brinda na detenidonan caminda nan por sigui diferente curso y opleiding pero tambe ta forma parti di varios proyecto pafo di KIA, caminda nan ta haci diferente trabou pa nos comunidad.

Na mes momento, pa loke ta trata e cuido, tin diferente cambionan a tuma luga, no solamente e renobacion completo pa loke ta trata e “medische dienst”, pero tambe a introduci un metodo nobo di traha specificamente pa nos hobennan cu

yama “youturn methodiek”. Esaki ta un metodo cu ta wordo uza den tur e institutonan na Hulanda, di e forma ey nos ta trata na inverti den e organisacion. Sin mas, e ta keda importante y prioridad pa por logra percursu pa un instituto coreccional completamente nobo.

Esaki ta algun di e plannan cu a wordo presenta na e Secretario di Estado, pa cual dentro di poco un business case ta bay wordo scirbi door di un organisacion cu tin hopi experiencia pa cu tematica aki. Di e forma aki nos lo tin un producto final pa por presenta y delibera cu Hulanda, pa wak con nos ta bay percursu pa financia esaki.

E parti infrasructural ta keda un elemento importante mirando cu esaki tin un impacto riba procesonan, no solamente di seguridad, pero tambe riba loke lo por brinda tur e detenidonan, pa asina na final di dia por garantisa un resocialisacion y un reintegracion bek den nos comunidad exitoso.

Minister Tjon ta wak bek riba un reunion sumamente positivo, caminda lo sigui delibera cu e ekipo di e Secretario di Estado pa por logra haci esaki un realidad. ■■■





MINISTER
Eudy Croes

UN TOTAL DI 13 COLLEGE DI STATE UNIVERSITY OF NEW YORK "SUNY" A CONFIRMA PA E 'LUNCH AND LEARN EVENT'

Ampliando plataforma pa e studiantenan!

Creando posibilidad pa studia rond di New York:

Recientemente, Minister Plenipotenciario Sra. Zulema Erasmus tabata na Aruba y nos a hiba un reunion extenso y fructifero pa amplia y estrecha e posibilidadnan pa nos studiantenan por sigui un estudio avansa den area di New York na un prijs pagabel. Sigur lo tene cuenta cu e combinacion di e deportenan cu cada College ta ofrece.

Actualmente, Aruba tin nueve (9) estudiante kendenan tin un Arubalening studiando den region di New York State. Departamento di Enseñansa Aruba (DEA) a indica cu tin un demanda creciendo pa studia na New York State. Alabes, a ilustra cu e sistema di State University of New York, esta (SUNY) ta uno hopi bon hinca den otro, cual tin un excelente programa di Higher Education. Den cuadro di esaki Minister Plenipotenciario Sra. Zulema Erasmus ta organisando un 'Lunch and Learn Event' dia 16 di augustus proximo cu e representantenan di "The State University of New York" conoci como SUNY. New York tin e organisacion di e scolnan publico pa Higher Education di mas grandi na Merca.

Tur e scolnan aki hunto ta carga e nomber di SUNY (The State University of New York). Un total di 64 Higher Education Public College ta forma e SUNY Collegenan, kendenan ta opera 29 campus den State of New York, pero pafo di New York City cu un total di 400 mil estudiante di 160 pais rond mundo mas un total di 88 mil docente y staf. Strategia y idea ta pa por presenta na e representantenan di SUNY nos isla Aruba, nos sistema di enseñansa y e tipo di studiantenan cu nos ta prepara pa manda den exterior, entre otro Merca. Un total di 13 SUNY Public College a confirma cu nan lo ta presente na e lunch cu ta wordo ofreci na nan. Tur esaki ta pa habri combersacion y interes den forma di "networking" cu e meta final pa logra firma un MoU cu varios miembro di SUNY College cu e vision pa haya "in-state tuition" den e estado di State of New York.



E 'Lunch and Learn' aki lo tuma luga na Poughkeepsie, NY. Confirmacion di 13 SUNY Higher Education Public College a drenta, cual nan lo acudi na e 'Lunch and Learn Event'. Entre otro, Culinary Institute, Dutchess Community, Ulster Community, SUNY New Paltz, Bard College, Marist College, Hudson Valley, Orange County, SUNY Albany, BOCES, Westchester Community, John B. King Jr. Nos ta sumamente contento cu e prome stap aki y pronto nos lo mira su frutanan na beneficio di nos studiantenan.

Hudson Valley Caribbean Carnival:

Un otro punto cu nos a atende ta lo siguiente: dia 17 di augustus pues e dia siguiente tin un otro evento, esta e Hudson Valley Caribbean Carnival unda ATA como e trekker tambe lo bay ta presente pa promove Aruba. Minister Plenipotenciario Erasmus a extende un invitacion special na tur Arubiano cu ta biba na Merca pa asina forma parti di e celebracion aki pa celebra hunto Aruba su Carnaval. Den un siguiente articulo lo amplia mas riba e reunion extenso cu nos a hiba cu Minister Plenipotenciario Zulema Erasmus en conexion cu nos vision y varios programa pa nos studiantenan cu tin e interes pa studia na Merca na un prijs alcansabel. Trabounan ta avansando. Aruba ta estrechando su halanan. ■■■

Minister Endy Croes: "Stadion GPT Dakota un hoy a di proyecto pa nos deportistanan."

BOHAMA ARUBA A ENTREGA PARTI DI TRABOU Y E YABINAN DI STADION DAKOTA

Prome cu fin di aña 2024, Compleho Deportivo GPT lo ta den un bachi completamente nobo



Recientemente, Minister di Enseñansa y Deporte Endy Croes a ricibi bishita oficial di director di Bohama Aruba Sr. Sander Leijenaar y Sr. Jouel Croes cu ta “toezichthouder” di Gobierno di Aruba. Den e ocasion aki, a reuni pa firma un “proces-verbaal van opleveren”. Esaki ta nifica cu nan a firma un documento, unda ta indica cu nan ta cla cu e parti di nan trabou di renobacion na Compleho Deportivo Guillermo Prospero Trinidad na Dakota y a haci entrega di e yabi.

A renoba, entre otro e tribuna, bentana y dak. A construi un baño nobo y espacio pa F&B den e seccion di VIP. A verf e luga completamente y a instala coriente nobo. Sr. Croes a controla hunto cu e team di Bohama cu tur trabou ta haci. Unabes cu Gobierno di Aruba y Lotto pa Deporte a ricibi e “green light”, a firma e documento, unda ta declara cu nan ta entrega e yabi mesora. Bohama como contratista principal a entrega su parti di trabou, cual a keda sumamente bunita. Esaki no ta nifica cu e proyecto ta termina como cu otro contratistanan ta trahando awo riba e atletiekbaan.



E renobacion di atletiekbaan lo dura aproximadamente tres (3) luna mas pa finalisa e trabou. Fuera di esaki, tin algun peticion mas cu a bin acerca di AVB y FIFA cu mester cumpli cu ne entre otro, renobacion di e camber di referee. Pa esaki lo haci acuerdo cu otro contratistanan pa finalisa e trabou di renobacion. Finalmente, Minister Endy Croes a indica cu prome cu aña 2024 finalisa, e stadion lo ta den un bachi completamente nobo. ■■■

Minister Endy Croes:

PRONTO E DEPORTISTANAN POR HACI UZO DI E VLOER ULTRAMODERNO Y COMPLETAMENTE RENOBA DI CENTRO DEPORTIVO LIBERTADOR BETICO CROES



Recientemente, Minister Endy Croes a bishita Centro Deportivo Libertador Betico Croes na Santa Cruz pa mira e avancen di e proyecto di renobacion di e vloer. Pa hopi tempo no por a uza e sporthal pa evento deportivo. E container cu tur material a yega Aruba den luna di juli y e trabounan di renobacion a inicia. Herculan, un compania Hulandes a traha e material y a contrata un otro compania cu ta experto den instalacion di sport vloer rond di mundo pa instala e vloer di Sporthal.

Ta premira cu pa fin di luna di augustus e proyecto ta finalisa. “Nos ta papia di un inversion di 500 mil florin”, Minister Endy Croes a indica. Hunto cu Aruba Sport Uni (ASU), kende ta maneha Centro Deportivo Libertador Betico Croes lo planea un apertura, unda cu Pueblo di Aruba y e deportistanan por aprecia e cancha nobo aki. Pronto volleyball, basketball, tennis, futbol di sala y tur deporte cu ta wordo practica “indoors” por continua bek den Centro Deportivo Libertador Betico Croes despues di hopi tempo.

Sr. Robert Polewski, kende ta instalado oficial di e compania Herculan a indica cu Herculan ta un compania mundialmente renombra den sport vloer. Ademá, Sr. Polewski tin e experticio y conocimiento, ya cu el a instala vloer pa diferente sporthal rond di mundo. Actualmente, e ta na Aruba, unda cu nan ta instalando e vloer ultramoderno di e marca Herculan MF 10 plus 2, cual ta un di e miho materialnan di mundo. “Gabinete Wever – Croes II ta priminiti y nos ta cumpli. Nos ta gradici directiva di ASU, Lotto pa Deporte y Gobierno di Aruba pa haci e proyecto aki posibel pa nos deportistanan. Nos curason ta bati pa deporte. Pabien pa tur deportista,” Minister Endy Croes a finalisa. ■





Arte di Muraya na San Nicolas no ta simplemente
verf riba bloki. E creatividad, fantasia y color riba e
murayanan ta un fuente di inspiracion di artistanan
pa encurasha nos pa brasa e poder di creatividad y
colaboracion na nos barionan di Aruba.

2024

AÑA DI STABILIDAD Y PROSPERIDAD